

Cyrkwinski zakon

wo cyrkwinskim zastupnistwje serbskeho podžela wobydlerstwa
Ewangelsko-lutherskeje krajneje cyrkwje Sakskeje (Serbski zakon – SerbZ)

z dnja 18. nowembra 2002
reg. č.: 1023 (7) 436

Krajna synoda Ewangelsko-lutherskeje krajneje cyrkwje Sakskeje je, wukonjejo zamołwitosć krajneje cyrkwje, zastupować a spěchować wosebite cyrkwinske naležnosće na swoim teritoriju bydlacych wosadnych serbskeje narodnosće a za to stworić přihódne prawniske wuměnjenja, sčehowacy cyrkwinski zakon wobzamknyła:

§ 1

(1) Za spjelnjenje wosebitych cyrkwinskich naležnosćow serbskich wosadnych we wosadach přislušacych serbskemu sydlenskemu teritorijej wutwori so zhromadne zastupnistwo, kotrež mjenuje so „Serbski wosadny zwjazk“. Do serbskeho sydlenskeho teritorija w zmysle tutoho cyrkwinskeho zakonja liča so komunalne gmejny a džěle gmejnow, naspomnjene w sakskim Serbskim zakonju z dnja 31. měrca 1999 (SächsGVGl. s. 161) w aktualnje plaćiwej wersiji.

(2) Serbski wosadny zwjazk je korporacija zjawneho prawa ze sydłom w Budyšinje.

(3) Nadawk Serbskeho wosadneho zwjazka je

1. zaručić duchowne zastaranje serbskeho podžela wobydlerstwa přez wozjewjenje słowa a wudželenje sakramentow, dušepastyrstwo, rozwučowanje a serbskorěčne křesćanske pismowstwo;
2. prócować so wo zdobywanje serbskeho dorosta w cyrkwinskej službje;
3. starać so wo to, zo so w serbskemu sydlenskemu teritorijej přislušacych wosadach ze serbskim podžělom wobydlerstwa wosebita etniska a rěčna identita ewangelskich Serbow wobchowa a spěchuje;
4. předstajeć a zastupować wosebite naležnosće ewangelskich Serbow w cyrkwi a zjawnosći.

(4) Dohladowanska instanca za Serbski wosadny zwjazk je Ewangelsko-lutherski wobwodny cyrkwinski zarjad w Budyšinje.

(5) Serbskemu wosadnemu zwjazkej přislušeja jako sobustawy:

1. fararjo, kotřiž serbskemu podželej wobydlerstwa přislušeja abo serbsku Božu službu wotměwaja;
2. přeco dwaj za cyrkwinskeho předstejićerja wolomnaj serbskaj wosadnaj z wosadow, přislušacych serbskemu sydlenskemu teritorijej, kotraž mataj so wot swojeho cyrkwinskeho předstejićerstwa wuslać;
3. hač do pjeć dalšich za cyrkwinskeho předstejićerja wolomnych serbskich wosadnych, kotřiž so wot sobustawow pod cyfru 1 a 2 mjenowanych powołaja.

(6) W běhu štyrjoch tydzenjow po terminje w § 7 wotr. 1 mjenowanym ma so dohladowanskej instancy a krajnocyrkwinskemu zarjadowej po wosadach rjadowana lisćina sobustawow Serbskeho wosadneho zwjazka sposrědkować, na kotrež su čłonojo předsydstwa wosebje mjenowani. Tuta lisćina ma so w cyrkwinskej zjawnosći wozjewić.

§ 2

Organaj Serbskeho wosadneho zwjazka stej sobustawska zhromadźizna a předsydstwo.

§ 3

(1) Sobustawska zhromadźizna rozsudza předewšěm wo

1. wustawkach Serbskeho wosadneho zwjazka a pozdžišich změnach tutych wustawkow;
2. směrnicach za džělawosć předsydstwa k zwoprawdženju nadawkow Serbskeho wosadneho zwjazka;
3. powołanju předsydstwa;
4. lětnym hospodarskim planje Serbskeho wosadneho zwjazka;
5. schwalenju lětnje rozprawy a wuwjazanju předsydstwa.

(2) Wustawki Serbskeho wosadneho zwjazka dyrbja so wot krajnocyrkwinskeho zarjada schwalić a maja so w hamtskim łopjenu krajneje cyrkwje wozjewić. Tosame plaći za změny wustawkow.

(3) Nadrobnosće wo zwołanju a džělawosći sobustawskeje zhromadźizny rjaduja wustawki Serbskeho wosadneho zwjazka.

§ 4

- (1) Předsydstwo ma so wot hłowneje zhromadźizny kóždy šěsć lět znowa wolić. Dotalne předsydstwo wostanje přeco hač do wólbow noweho předsydstwa w zastojnstwje.
- (2) Předsydstwo zestaja so z předsydy, městopředsydy kaž tež třoch dalších wolenych sobustawow. Předsyda abo – jeli bu lajk za předsydu wuzwoleny – městopředsyda dyrbi Serbski superintendent (§ 5) być.
- (3) Předsydstwo ma Serbski wosadny zwjazk nawjedować a jón prawnisce a w zjawnosći zastupować. Wone je za spjelnjenje nadawkow Serbskeho wosadneho zwjazka na zakładze za to wot sobustawskeje zhromadźizny postajenych směrnicy zamołwite.
- (4) Předsydstwo ma předewšěm
 1. zwoprawdźeć wobzamknjenja sobustawskeje zhromadźizny;
 2. naćisnyć lětny hospodarski plan Serbskeho wosadneho zwjazka a jón sobustawskeje zhromadźiznje k schwalenju předpožić;
 3. přihotować sobustawske zhromadźizny a na nje přeprašować;
 4. rozprawjeć jónu wob lěto sobustawskeje zhromadźiznje wo swojej dźěławosći.
- (5) Nadrobnosće wo dźěławosći předsydstwa rjaduja wustawki Serbskeho wosadneho zwjazka.

§ 5

- (1) Za spjelnjenje w slědowacym mjenowanych wosebitych duchownych nadawkow pola ewangelskich Serbow powoła krajnocyrkwinski zarjad serbskemu podźělej wobydlerstwa přisłušaceho abo serbsku Božu službu wotměwaceho fararja na krajnocyrkwinske farske městno. Tutón mjenuje so „Serbski superintendent“. Wobsadjenje a dowěrjenje farskeho městna přewjedzetej so po sluchanju Serbskeho wosadneho zwjazka wotpowědnje § 1 wotr. 3 kaž tež § 12 pismik c Zakonja wo dowěrjenju farskich městnow.
- (2) Serbski superintendent je zamołwity za dušepastyrskje zastaranje serbskemu podźělej wobydlerstwa přisłušacych abo serbsku Božu službu wotměwacych fararjow a kandidatow. Nimo zamołwiteho superintendenta je wón woprawnjeny k božoslužbnemu wozjewjenju słowa we wosadach přisłušacych serbskemu sydlenskeho teritorijej. Wón ma tam cyrkwinske žiwjenje přisporjeć a je dohladować, nastupa-li to serbski podźěl wobydlerstwa a přewjedjenje Božich službow a wosadnych zarjadowanjow w serbskej rěči. Zamołwity superintendent resp. wobwodny cyrkwinski zarjad mataj jemu wobdźělenje na dohladowanju nad tutymi wosadami zmóžnić, jedna-li so wo wosebite naležnosće serbskich wosadnych.
- (3) Jeho wobłuk dźěławosće wopřija předewšěm:
 1. wobdźělnistwo na cyrkwinskih wizitacijach we wosadach serbskeho sydlenskeho teritorija, hdžež so serbske Bože služby wotměwaja;
 2. sobuskutkowanje při ordinaciji a zapokazanju fararjow do jich zastojnstwa a při dohladowanju nad wukonjenjom služby, žiwjenskim wašnjom a dalekubłanjom fararjow a kandidatow we wosadach serbskeho sydlenskeho teritorija, přisłušeja-li fararjo a kandidaća serbskemu wobydlerskemu podźělej abo wotměwaja-li serbsku Božu službu;
 3. sobuskutkowanje při rozsudach wo skóržbach nastupacych tutech fararjow, njepředpisuje-li cyrkwinske disciplinarne prawo něšto druhe;
 4. posrědkowanje zarjadniskeho wobchada mjez tutymi fararjami na jednej stronje a krajnym biskopom kaž tež krajnocyrkwinskim zarjadom na druhej stronje;
 5. rozprawjenje wo cyrkwinskih podawkach we wosadach serbskeho sydlenskeho teritorija krajnemu biskopej abo krajnocyrkwinskemu zarjadej zhromadnje ze zamołwitym superintendentom, nastupa-li to serbske naležnosće.

Njeposrědnjeho dušepastyrskeho wobchada mjez krajnym biskopom a fararjami so to njedótka.

- (4) Nadrobnosće služby Serbskeho superintendenta a jeho zhromadneho skutkowanja ze zamołwitym superintendentom rjaduje službny porjad, kotryž wuda krajnocyrkwinski zarjad po sluchanju Serbskeho wosadneho zwjazka.

§ 6

Ewangelsko-lutherska krajna cyrkej Sakskeje spěchuje zhromadźenstwo a podpěruje krajnocyrkwinske hranicy přesahowace zajimy ewangelskich Serbow. K tutomu zaměrej dźěla wona předewšěm z Ewangelskeje cyrkwy šleskeje Hornjeje Łužicy hromadže. Wona móže z tutej cyrkwy jednotnu zamołwitosć Serbskeho wosadneho zwjazka a Serbskeho superintendenta wujednać.

§ 7

- (1) Přenje wutworjenje Serbskeho wosadneho zwjazka a wólba jeho předsydstwa matej so hač do 31. měrca 2003 zeskutkownić.
- (2) Nowowutworjeny Serbski wosadny zwjazk je prawnski naslědnik dotalneho serbskeho wosadneho zwjazka a wjedže jeho džělawosć dale.
- (3) W tej pod wotrězkom 1 mjenowanej chwili skónči so džělawosć dotalnych wosebitych zastupnistwow serbskich wosadnych džělow.

§ 8

Trěbne wuwjedženske postajenja k tutomu cyrkwinskemu zakonjej schwali krajnocyrkwinski zarjad po słuchanju Serbskeho wosadneho zwjazka.

§ 9

- (1) Tutón cyrkwinski zakon, kotryž ma so w němskej a hornjoserbskej rěči wozjewić, nabudže z 1. januarom 2003 płaćiwosć.
- (2) Zdobom zhubi cyrkwinski zakon wo cyrkwinskim zastupnistwje serbskeho podžěla wobydlerstwa Ewangelsko-lutherskeje krajneje cyrkwe kraja Sakskeje z dnja 4. januara 1949 (ABl. s. A 2) płaćiwosć.

Předležacy cyrkwinski zakon so z tym wuwjedže a wozjewi.

Cyrkwinske wjednistwo
Ewangelsko-lutherskeje krajneje cyrkwe Sakskeje
Kreß